

**Siunnersuut uunga: Inatsisartunut Naalakkersuisunullu il.il. ilaasortat  
aningaasarsiaqartitaanerat il.il. pillugit Inatsisartut inatsisaata  
allanngortinneqarneranik Inatsisartut inatsisaat nr. xx, uu. qqqq 2016-imeersoq.  
(Aningaasarsiaqartitaanerup aallartiffia)**

**pillugu**

**Suleriaatsimut Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Lars-Emil Johansen, Siumut, siulittaasoq  
Inatsisartunut ilaasortaq Agathe Fontain, Inuit Ataqtigiit  
Inatsisartunut ilaasortaq Ane Hansen, Inuit Ataqtigiit  
Inatsisartunut ilaasortaq Justus Hansen, Demokraatit  
Inatsisartunut ilaasortaq Nikolaj Jeremiassen, Siumut  
Inatsisartunut ilaasortaq Steen Lynge, Atassut  
Inatsisartunut ilaasortaq Anthon Frederiksen, Partii Naleraq -

**Aallaqqaasiut**

UPA15/41-mi inatsisartunut ilaasortat ulloq taanna Inatsisartunut qinerneqarnerminniit (ulloq qinersivik) aatsaat akissarsiaqartalernissaat siunertaralugu Aningaasarsiaqartitsinermut inatsisip allanngortinnissaanut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut tunngavigalugu siunnersuut saqqummiunneqarpoq.

Ataatsimiititaliap isumaqatigiittup immikkoortup UPA15/41-p akuersissutigineqarnissaa inassutigaat, inatsisissatullu siunnersuut manna tamatuminnga malitseqartitsineruvoq.

Inatsisissatut siunnersuut manna Naalakkersuisut Inatsisartullu Siulittaasoqarfiata peqatigiillutik saqqummiussaraat.

Inatsisissatut siunnersuut manna ulloq 8. april 2016 Inatsisartut siullermeerinninneranni Suleriaatsimut Ataatsimiititaliamut suliarineqartussanngortinneqarpoq.

**Siunnersuutip pingaarnertut imarisai siunertaalu**

Siunnersuutigineqarpoq Inatsisartunut ilaasortat nutaamik qinigaasut siunissami aatsaat aningaasarsiaqartinneqartalissasut ullormit qinigaaffimmit, tassa ullormit qinersivimmit, qaammatip qinigaaffimmik aallaqqaataaniit pisarunnaarlugit. Ilanngullugu siunnersuutigineqarpoq Inatsisartut Siulittaasuat, Naalakkersuisut Siulittaasuat Naalakkersuisunullu ilaasortat aatsaat aningaasarsiaqartinneqartalissasut ullormiit taamatut atuutilerfimminniit.

**Siunnersuutip Inatsisartuni siullermeerneqarnera**

Siullermeerneqarnerani erserpoq siunnersuut taamatut isikkoqartillugu Inuit Ataqaqtiinnit, Demokraatinit, Partii Naleqqamit, Atassummit attaviitsumillu Naaja Nathanielsenimit taparserneqartoq.

Siumup siunnersuut taamatut isikkoqartillugu itigartippaa inassutigalugulu Inatsisartut Naalakkersuisullu atugaat pitsanngorsarniarlugit qinerseqqinnissami atorneqartussanik naleqqussaasoqassasoq.

Inatsisissatut siunnersuummik itigartitsinermut tunngavilersuutitut immikkut oqaatigineqarpoq qinikkatut atuuffik allatigut inuussutissarsiornermik ingerlatsinermut sanilliullugu aningaasatigut orniginarnerusariaqarmat, taamaaliornikkummi anguneqassammat nunatta ingerlatitaanerani inatsisiliortut piukkunnaatillit amerlanerusut sassarsinnaalernissaat.

**Ataatsimiititaliap siunnersuummik suliarinninnera****Inatsisartunut ilaasortanut aningaasarsiatigut atugassarititat**

Siunnersuutikkut siunertarineqarpoq Aningaasarsiaqartitsineq pillugu inatsimmi § 2, imm. 1, oqaaseqatigiit siullerni aalajangersakkap ima oqaasertallip allangortinneqarnissaa:

*”Inatsisartuni ilaasortaq qaammammi siullermi ullormi taassuma aallaqqaataani qinigaanerup akuersissutigineqarfianit aningaasarsiaqartinneqalerlunilu aningaasartuuteqarnermut tapisiaqartinneqalissaaq. ....”*

Imaalillugu:

*”Inatsisartunut ilaasortaq ullormit qinerneqarfimminniit aningaasarsiaqartinneqalerlunilu aningaasartuuteqarnermut tapisiaqartinneqalissaaq. ....”*

Takuneqarsinnaavoq siunnersuut taamaallaat Inatsisartunut nutaarluinnarmik qinigaasunut sunniuteqassasoq. Taamaalilluni ilaasortat qinigaaqittut atorneqarnaviannngillat, taakkumi § 2, imm. 1, oqaaseqatigiit kingulliit malillugit qaammatip Inatsisartunut

ilaasortaajunnaarfimmik naanerata tungaanut, taamalu aamma qaammat qinersivik tamaat, tamakkiisumik aningaasarsiaqartinneqartussaammata.

Inatsisartut Siulittaasuannut, Naalakkersuisut Siulittaasuannut kiisalu Naalakkersuisunut ilaasortanut aningaasarsiatigut atugassarititat

Siunnersuutikkut siunertarineqarportaaq Aningaasarsiaqartitsinermut inatsimmi § 6, imm. 4, oqaaseqatigiit siullerni aalajangersakkap ima oqaasertallip allannqortinneqarnissaa:

*”Inatsisartut siulittaasuat, Naalakkersuisut siulittaasuat Naalakkersuisunullu ilaasortat qaammatip qinigaaffiup aallaqqaataanit qaammatip taamatut atuukkunnaarfiup naanissaata tungaanut aningaasarsiaqartinneqassapput.”*

Imaalillugu:

*”Inatsisartut siulittaasuat, Naalakkersuisut siulittaasuat Naalakkersuisunullu ilaasortat ullormit atuutilerfimminniit qaammatip taamatut atuukkunnaarfiup naanissaata tungaanut aningaasarsiaqartinneqassapput.”*

Taamatut allannqutissatut siunnersuuteqarnerup aningaasatigut kingunerisassai massakkorpiaq annertussusileruminaapput, ukiunili Inatsisartunut qinersisoqarfiusuni Naalakkersuisuniluunniit nikittoqartillugu Nunatta Karsiata sipaaruteqalaarsinnaanissaa nalilerneqarpoq.

Inatsisartuni qinikkatut sulinerup soqutiginarnerulersinneqarnissaa

Siunnersuut tunngavigalugu Inatsisartuni qinikkatut sulinerup soqutiginarnerulersinneqarnissaa eqqarsaatigalugu ataatsimiititaliap UPA15/41-mut isumaliutissiissut innersuussutigissavaa. Tassani ilaatigut allassimavoq:

*”Siunnersuutip siullermeerneqarnerani oqaatigineqarpoq Inatsisartuni qinikkatut sulinerup soqutiginartuaannarnissaa siunertaralugu Inatsisartunut ilaasortat aningaasarsiaqartinneqarnikkut orniginartunik nalinginnaasumik atugassaqartinneqarnissaat qularnaarniarneqartariaqartoq.*

*Inatsisartuni qinikkatut sulisinnaanerup soqutiginartuarnissaa eqqarsaatigalugu qularutissaanngilaq aningaasarsiaqartinneqarnikkut atugassarititaasut nalinginnaasumik sunniuteqarsinnaammata. Matumanili siunnersuut eqqarsaatigalugu ilimananngilaq qinigassanngortissinnaagaluartut Inatsisartunut qinigassanngortikkusunnginnissaat, aatsaat ullormit qinersivimmiit aningaasarsiaqalernissaq pissutigiinnarlugu.*


**Siunnersuutip aningaasatigut kingunerisassai**

Siunnersuutip aningaasatigut kingunerisassaatur naatsorsuutigineqartut inatsisissatut siunnersuummut nassuiaatini taaneqartut apeqqusissallugit tunngavissaqarsorinanngilaq.

**Ataatsimiititaliap inassuteqaatai**

**Tamanna tunngavigalugu siunnersuutip akuersissutigineqamissaa ataatsimiititaliap isumaqatigiittup inassutigaa.**

Taamatut oqaaseqarluni isumaliutissiissummilu oqaatigineqartutut paasinnilluni ataatsimiititaliap matumuuna siunnersuut aappassaaniigassanngortippaa.

  
(Formand)

